

Date – 15/12/2025

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Synod Inkhawmpui vawi 102-na Zarkawt Presbyterian Kohhran-a neih chu nizan khan a tiak a, Sethawna awm Jordan Center atan kum 2026-27 Synod budget-ah grantin-aid nuai za hnih (Rs 2,00,00,000) dah rem tih a ni.
- 2. Sorkar laipui hnuaia Ministry of Textiles leh Mizoram sorkar hnuaia Commerce & Industry tangkawpin an buatsaih - Pre-Christmas State Handloom Expo chu puantah hmanga eizawngtuten tha an tih thu leh an hlawkpui hle.
- 3. Prime Minister Narendra Modia chuan vawiinah ram pathum Jordan, Ethiopia leh Oman tlawh turin a zin chhuak dawn.
- 4. Australia a inkahna thlengah mi 12 an thi.

<><><>

SYNOD

Synod Inkhawmpui vawi 102-na Zarkawt Presbyterian Kohhran-a neih chu nizan khan a tiak a, Sethawna awm Jordan Center atan kum 2026-27 Synod budget-ah grantin-aid nuai za hnih (Rs 2,00,00,000) dah remtih a ni.

Synod Inkhawmpui vawi 102-naah hian Pathianni chawhma inkhawmah Pastor 20 nemngheh niin Pro. Pastor 19 ruat an ni a, chawhnu inkhawmah Lalpa Zanriah Sakramen neih a ni a, zan inkhawmah Moderator kalchhuak tur Rev. RC Lalnghakliana thlahna thuchah sawiin Moderator thar chu Rev John Raldosanga a ni.

Synod Inkhawmpui 2025-ah hian rorel palai mi 2,166 leh Kohhran dang palai 34 an vaiin mi 2,200 an kal a, an zingah hian Palai thlan mi 1,323 leh palai ni sa mi 843 an ni a, Tun dinhmunah Presbyterian Kohhran-ah hian member 6,46,891 an awm mek a, Synod Inkhawmpui vawi 103-na chu Aizawl Chanmari Pastor Bialin Chanmari Kohhran Biak Inah an thleng ang.

Inrinni-a Synod rorel inkhawm chuan Sethawna awm Jordan Center chu lak tha an ti a, Ruihhlo ngaite enkawl na hmun Jordan Centre hi sorkarin a enkawl thin a, nikum June thla khan Chief Minister Pu Lalduhoma hoa Council of Minister thukhawm chuan midang kuta hlan chhawnnise an ti a, kumin June thla khan Social Welfare Department chuan Jordan Center enkawl chungchangah hian Mizoram Synod a lo dawr tawh a ni.

Synod Executive Committee (SEC) chuan Jordan Center chungchang hi a ngaihtuah a, tun tum inkhawmpuiah hian chhawpchuak in Jordan Center lak churorel palaite chuan tha an ti a, a bawhzui turin SEC kutah dah a ni.

Synod Inkhawmpuiin a pawm zingah Mizoram Christian College-a D.El.Ed (Diploma in Elementary Education) leh B.Ed (Bachelor of Education) zirna hawn rawtna a tel a, hemi bakah hian Synod Hospital dinhmun en that leh Synod Hospital-a lung lam enkawlina changtlung zawk a awm theih nana hmalak tura rawtna te pawh pawm a ni.

<><><>

FARKAWN INCIDENT

Champhai District a Farkawn chhim veng (Theirekawn) a cheng Pu C. Lalramenga (kum 49) thihna chungchangah thil felhlel a awm nia rin avangin a Farkawn damdawiinah a ruang postmortem a ni a, nimin tlai khan vui liam a ni.

Farkawn VCP hnen atanga kan palai thudawn danin Pu C. Lalramenga hi Inrinni khan Myanmar ram lamah kalin Farkawn VDP ten ringhlelin a lo haw lam an lo chang a, Inrinni zan rei tawh-ah Zu fun engemawzat a kut atangin an man a, Village Defence Party (VDP) ten thu an zawhfiah hnuah an chenna Inah motor a hruai a niin nimin zing dar 5:00 vel khan a boral zui ta a ni.

A chhungten he thihna thilah hian thil fel tawk lo, thihna khawpa kut inthlakna a thleng nia hriain FIR police hnenah an theh lut a, Farkawna Police duty te bakah Dungtlang leh Champhai atangin Police Farkawnah kalin Pu C. Lalramenga ruang hi Farkawn damdawiin ah Postmortem Examination tih zui nghal a ni a, Mizoram police te chuan Farkawn VDP mi leh sa (7) te thu an zawhfiah hnuah heng mite hi Dungtlang Police Station a thu zawhfiah zui atan Farkawn atangin Dungtlangah an hruai phei a, vawiin ah Champhai District Court-ah kalpui an ni ang.

Pu C. Lalramenga hian fapa pakhat leh fanu 4 a kalsan a, a nupui nen an awm hran lai a niin tun hma lamah ruitheih thil vanga an khawtlang hruaituten an lo zilhhau tawh hnu a ni tih thu dawnna chuan a tarlang a ni.

<><><>

PMUY

Sorkar laipui hmalaknaa a thlawna Gas connection pek chhuahna Pradhan Mantri Ujjwala Yojana (PMUY) hnuaiah Mizoram pumah Gas connection sing 36,031 pek chhuah a ni tawh.

Supply Department hotute sawi danin PMUY hnuaia a thlawna gas connection hi chhungkaw harsa gas connection nei lo thla khata cheng sing 1 lalut tling lote tan dil theih niin, hmeichhia kum 18 tling tawh chhungkaw member zing a mi in a dil thei a, Gas Connection la nei lote chuan nakkum 2026 January ni 31 aia tlai lovah bialtu Distributor hnenah emaw online (PMUY : New Ujjwala 2.0 Connection)-ah an dil thei a, PMUY hi state quota bik awm lo niin, tun dinhmunah Mizoram a PMUY connection awm chu sing 3, 6,031 niin thingtlang Distributor thenkhat la nei tlem te chu nei tam tura tan la turin an hriattir thu an sawi a ni.

<><><>

PRE CHRISTMAS SPECIAL HANDLOOM EXPO

Sorkar laipui hnuaia Ministry of Textiles leh Mizoram sorkar hnuaia Commerce & Industry tangkawpin an buatsaih - Pre-Christmas State Handloom Expo chu puantah hmanga eizawngtuten tha an tih thu leh an hlawkpui thu an sawi.

Pre-Christmas State Handloom Expo hi tun thla ni 3 atanga ni 16 thleng khian neih a ni dawn a, expo-ah hian Vanapa Hall kawt atanga SBI Main Branch kawt thleng stall 60-ah Mizo puantahtu te tah puan leh an thil siamchhuah hrang hrangte chu lei theihin an phochhuak a, Christmas pual a nih angin an thil phochhuah te hi a man pangngai aiin an ti tlawm a, he exhibition tlawhtute tan a awlsam zawk nan Department chuan Foodstall 4 a dah bawk a ni.

He expo-a an thilsiam phochhuaktu, Lapar dawr nghaktute chuan he expo hi an hlawkpui hle tih sawiin, an thilsiam chhuah hrang hrang- naute puan, arkeziak keychain leh puan bih chi te chu mipui tam zawk hmuh theiha phochhuahna a nih avangin an hlawkpuiin, expo buatsaihtute chungah an lawm hle tih an sawi.

Byte : Lapar

Weave me more dreams neitu Pi Irene Chhangte chuan an puan zawrhte chu cotton atanga siam niin, hmanlaia puan design leh hnahchawi thlan hrang hrang an hmang a, puan bih chi bakah ipite pui, mipa diar, puansin chi stoles, table-runner, leh keychain te an phochhuak tih sawiin, dawr an neih loh avangin hetiang expo hi an tana inphochhuahna hun tha tak a nih avangin sorkarin a buatsaih sak chu lawmawm an ti hle tih a sawi a, mipuite pawhin an beisei ang ngeia an hlutsak thu a sawi bawk a ni.



MIZORAM UPC

Mizoram UPC kohhran inkhawmpui lian ber, General Assembly nizana R. Dengthuama Hall, Aizawl-a neih zawh tak chuan kum 2026 budget atan vaibelchhe 36.57 a pawm a, sum hmanna tur langsar zingah Biak In sak tanpuina leh Pastor Quarters sakna tur a tel a ni.

Mizoram UPC inkhawmpuih hian Zirtawpni Zan atanga Pathianni zan thleng revival inkhawmin hun an hmang a, nimin Pathianni chawhma inkhawmah General Superintendent Rev. P. Lalrinawma chuan Pastor pali (4) a nemnghet a, Inrinni zanah mi 15 hnenah Ministerial Licence a hlan bawk.

Mizoram UPC General Assembly report bua a lan danin, kohhran member zawng zawng zat hi mi 79249 an ni a, Pastor bial 78 neiin, Pastor 97 an awm mek a, kum 2025 chhungin hmun 20-ah kohhran thar din a ni a, member 2617-in an pung bawk.



KHAWZAWL POLICE

Khawzawl Police Station-ah kumin January atanga thla hlui November thla thleng khan thubuai chi hrang hrang 60 ziahluh a ni.

Khawzawl Police Station atanga thu dawn danin, Khawzawl Police Station-ah hian kumin chhungin Case chi hrang hrang ziahluh zingah rukruk leh in rawk thubuai ziahluh a tam ber a, Case 18 ziahluh a ni. Thubuai ziahluh zingah hian pawngsual Case 1 leh POCSO Case 9 ziahluh a nih bakah ND&PS Act hnuaiah Case 10, MLP Act hnuaiah 8, Accident a thihna thleng Case 2, intihnat Case 5, dawt hmanga intih mualphona Case 1, inbumna Case 5 leh voyeurism Case 1 ziah luh a ni.

Thla hlui November thla bikah khan ND&PS Act hnuaiah Case 2, MLP Act hnuaiah Case 2, inbumna Case 1 leh dawt a intihmualphona Case 1 ziahluh a ni bawk.

<><><>

CTP

Mizoram pum huap Catholic Thalai Pawl inkhawmpui vawi 21-na, December 11 atanga neih chu nizan khan a tiak.

Lawngtlaia Francis Xavier Parish-a inkhawmpui hi Aizawl bishop Most Rev. Stephen Rotluanga chuan a hmanpui a, inkhawmpuiah hian rorel a nih bakah Cultural Day hman niin kum dang ang bawkin khawtlang tana thil tha tihna hun an hmang bawk.

Catholic Thalaite hian Central Young Lai Association hnenah oxygen concentrator an pe a, hei bakah hian YLA branch 10 hnenah gas stove pein inkhawmpui nghahna YMA, Lawngtlai Vengpui leh New Vengpui hnenah plastic thutthleng an pe bawk a ni.

Krismas chibai bûkna thilpek chu chhungkaw harsa panga hnenah hlan a ni a, District Hospital tan puannuam thahnem tak an pe bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM TO JORDAN

Prime Minister Narendra Modia chuan vawiinah ram pathum Jordan, Ethiopia leh Oman tlawh turin a zin chhuak dawn. Ram a tlawh hmasak ber tur Jordan ah hian King Abdullah II bin Al Hussein nen an inkawm dawn a. Tun tum hi Jordan a tlawh hmasak ber tur a ni dawn a, ram pahnihte thawhhonain kum 75 tlin na a ni chiah dawn bawk a. Ram pahnih inkar leh khawvel thil thleng pawimawh tak takte an sawidun dawn a. Hemi hnu hian PM Modia hian Ethiopia a pan leh dawn a. Ethiopia ram hruaitute nen India leh Ethiopia inkara thawhdunna hrang hrangte an sawidun dawn a. A hnunung berah Oman tlawh lehin Sultan Haitham ibn Tarik nen an inhmu ang a. Tun tum hi Oman leh India thawhdunna in kum 70 a tlinna tur chiah a ni bawk ang.

<><><>

AUS

Australia a inkahna thlengah mi 12 an thi. Pawikhawihna thlenna hmun hi Sydney-a Bondi tuipuikamah niin silai keng mi pahnihten mipui pungkawm te an pawngkah a. Juda ho hunpui paiwmawh Hannukah hmanga kalkhawmte chu an bitum nia hriat a ni a. He pawikhawihna hi sawrkar chuan firfiaka chetna nih thu a puang a. Silai keng pakhat zawk hi a hmunah kahhlum niin midang pakhat hi police te kutah a awm tawh bawk a ni. He inkahnaah hian mi 21 in hliam an tuar a. An zingah hian Police pahnih an tel a. Australia PM Anthony Albanese chuan pawikhawihna thleng chuan a thawh thu leh pawi a tih thu a sawi.

<><><>